

自棄其肉、獰視水中之影、將奪之、遂並失其肉、

畏廬曰、貪人無厭、終其身均沈影水中也、

犢車過狹巷而陷其轍、御者惶急、目其車而呼神、神聞號而至、戒之曰、肩而軸、鞭而牛、車脫險矣、焉待呼我、而惟致力於能盡之地、始大有驗、憚其勞而哀我何益、嗟夫、人惟自求助可爾、待人而爲、雖神猶不爲底、而況人耶、

魍生而盲、一日告其母、自詡能視、母魍欲證其不能視之實、乃取檀香之屑、陳其前、問之、魍曰、石也、母魍歎曰、爾盲其目、且並盲其鼻、

畏廬曰、以新學之明、證舊學之闇、自知爲闇、則可以嚮明、若居闇而侈明、未有不爲一魍者、

有牧於叢蔚之地、而亡其犢、四訶莫得、祝曰、神孰能知吾犢所在、請殺